

## Isoyi Mase dər dənye yat

1 Yoğa vad k'ē du miθaθ naž Awgust - počçoi Rum - həkm mad k'ē ən kəli sarzamini Rum rûyxat k'ənan. 2 Āy awalon rûyxat vad ata ən dawrayi həkmroniyi Kirinius ən Suriya wərayd. 3 Bu ar tan-an dər xi qawni xaraθ šod k'ē əfi nəm ənda nəvəšan. 4 Isəf ja naž Jalil, na xeri Nosira, əndoyd ata dər Yahudo, i Dowudi xer šod k'ē du xeri nəm Bayt-lahm vad. Dabe-ay idab šod k'ē u, Isəf, naž Dowudi zot at qawn vad. 5 Way qatay Maryam ja šod k'ē way-ra xiḡay k'iyagin (pistagin) vad ata homilador vad. If-an šod k'ē əfi nəm ja ən rûyxat nəvəšan. 6 Ata if-an ənda k'ē vad, əmi birayaǰi waxt fərap. 7 Ata xi awaloni Poc-ay vøyûg a zərwed-ay žə-Way, ata awad-ay ən wanûr, dabe k'ē ən qəşxona if-ra jayan na vad. 8 Nak ənda-an ən wû daxt çəpanaθ vad. If-an xo ənda nəyûst ata xi mol-a-hol-əf xo šab çəpanay k'eg. 9 Ata wû nəgamin fariḡtayı Xədowand pəredi if ri δed a nuri ilohi girdəwanoyi if rəxnāy k'eg. Çəpanaθ-an čost tarst. 10 Ata fariḡta if-ra laft k'ē: «X'əyek na vit! Az-a təmox-ra lap xəş xabûr varin, k'ē ay-da kəli mardəm-ra manor xəşbaxtay mit. 11 Nər ən Dowudi xer təmoxi Najotkən dər dənye yat, Maseyi Xədowand! 12 Ata ana təmox-ra nəxana: təmox-ta kudaki zərweədagin ən wanûr pəxəvdagin winit». 13 Ata wû nəgamin fariḡta qatay ləxkûri maloyikaθ-an ri δed k'ē X'ədoy-ra-əf xo šəkr at ofarin laft k'ē: 14 «Xədowand-ra-u joh a jalol dəm tûr asmen, ata osoyiḡay ma zəmaδ, ata rāmdilay odamen-ra!» 15 Ata yoğa vad k'ē waxte k'ē fariḡtaaθ-an naž əfi pəred dər asmen xəwûxt, çəpanaθ venaven-ra laft k'ē: «Təžit badəm dəri Bayt-lahm ata k'asəm k'ē çig ənda wəreḡda, ata Xədowand mox-ra çig xabûr žəmta». 16 Xətvanarm-an dəri pān δed ata naž Maryam a Isəf ata Kudak-əf ən wanûr pəxəvdagin vøyûg. 17 Ata waxte ki wint-əf žə-Way, du gapaθi fariḡta laftagin-əf naql k'eg. 18 Ata ar

tan k'e du čəpanaθi naql xod, ayron-an rayd. 19 Ata Maryam kəli yu  
gapaθ xo ən xi zawδ wəriĵant ata fikr-ay xo k'eg. 20 Ata čəpanaθ-an  
γ°ovd, xi wintagin a xədagin-be-əf X°əδoy-ra šəkr k'eg: kəli farixtayi  
gapaθ k'e if-ra-ay lafta vad, razg nəmoxt.